

զերիս ամս , յորժամ խօթացաւ բարեյիշատակ որդեակն իմ , գրեցի ձեզ առաքել այսր զՊատրիարք վարդապետն տիրել տան ձերոյ , եւ ինձ առանձնանալ ուրեք ողբալ զԹշուառութիւն անձին իմոյ : Եւ յանցելումն ամի առաքեաց նա զանդրանիկ աշակերտ իւր զՅակոբ վարդապետ (Նալեան) . և ես հաճութեամբ նորին արարի զնա ինձ և ինքեան փոխանորդ և առաքեցի այդր , և մնացի գալըստեան նորա , որպէս խոստացաւն . և այժմ վերստին թախանձանօք աղաչեմ , խնայել 'ի դազաշեալ ծերութիւնս և ազատել զիս . զի եթէ բանք իմ լսելի լինին ձեզ , առաքեցէք զվարդապետդ իմ լինիլ տէր տան ձերոյ , եւ մի մուսնայք զաշխատութիւն դորա , որ վասն Ս . Տանս եւ Ս . Եկեղեցեացդ , և մի անտես առնէք զաղաչանս իմ . զի ողորմութեամբ Տեառն տունն ձեր լի է հոգեւոր եւ մարմնաւոր բարեօք , կրօնաւորօք եւ աղօթաւորօք , որք զյայգ և զցերեկ կան 'ի պաշտօն փառաբանութեանն Աստուծոյ : Զի եթէ ոք չարախօսեալ իցէ զսիրելի եղբարց իմոց . ինքն լիցի պարտաւոր , զի գլուխ մեղաւորաց ես եմ . աղաչեմ զբարեպաշտող կատարել զհայցուածս իմ , և ինձ որպէս հրամայէք այնպէս առնեմ , կալ աստ , եւ կամ գնալ յերկիրն իմ , ուր ուրեք և իցէ . շնորհ ունիմ զձէնջ եւ զհամօրէն ազգէն իմմէ , զի ոչ ումեք եղբարց իմոց արարիք , որպէս ինձ . զի ցուպ 'ի ձեռին իմոյ եկի 'ի միջի ձերում , եւ այսքան բարիս արար Տէր օգնութեամբ ձեր :

Արդ՝ սիրելիք իմ վայելեցի և ողորմութեամբ Տեառն զտունն ձեր ամենայն բարեօք լցի , ոչ ես , այլ շնորհքն Աստուծոյ : Եւ նշանն անկարողութեան իմոյ երեւեցաւ յանցելումն ամի , որոյ վասն վարդապետն իմ և դուք ամենեքեան վշտացեալ էիք յինէն , թէ ընդէ՞ր ոչ կուուեցար ընդ օտար ազգս : Արդարեւ բարեյիշատակ Իշխանն մեր մահտեսի Յարութիւն , վառեալ 'ի նախանձ աստուածային կամեցաւ մտանել 'ի հանդէս մարտի , սակայն արգելի զնա խրատիւք և յորդորական բանիւք 'ի խաղաղութիւն . եւ եթէ մտեալ էաք 'ի մարտ ըստ խրատու ձեր , ապաքէն արիւնն մեր խառնէր 'ի տօնս Ս . Զատիկին , որպէս Գալիլեացուոցն առ Պիղատոսիւ , և լինէր խափանումն տօնին ,